



INTRODUCZIUN

DAD ANDRI CASANOVA

Sil pli tard da Pastgas eis ei indicau da seregurdar, tgei ch'ei munta dad esser battegius e dad aschia esser cristian: Entras il batten essan nus uni cun Cristus, cun sia mort e cun sia levada. Quei ligiom che regala a nus spindrament ei regalaus a nus. Nus essan leventai en Cristus. Quei sa negin prender da nus. Nus vein art e part dalla veta celestia.

Deplorablamein ei tut quei pil pli buc veseivel e tschaffabel. Nus essan denton clamai dad «satisfar» a quei fatg. Cheu gida ei dad adina puspei ver Cristus avon egl, el ch'ei levaus dils morts e sesa en tschiel da vart dretga da Diu. Quella egliada po regalar a nus in surrir, in surrir che lai ir nus sin outra moda atras nossa veta. Quei surrir e quella legria da Pastgas duei accumpignar nus.

1. LECZIUN

Col 3,1–4

Vus essas leventai cun Cristus; perquei encuri quei ch'ei en tschiel, nua che Cristus sesa da vart dretga da Diu. Drizzei voss'egliada sin quei ch'ei en tschiel e buca sin quei ch'ei sin tiara.

Vus essas gie morts, e vossa veta ei zuppada cun Cristus en Diu.

Mo cu Cristus, nossa veta, vegn a cumparer, lu vegnis era vus a cumparer ensemen cun el en gloria.